



dänkmau-lied

Text: Hans Jürg Zingg

Melodie: Hans Jürg Zingg

Begleitimprovisation: Edwin Peter

dänk mau was e hänker bim hänken aues dänkt
dänk mau wär dra dänkt u zletschtamänd dr hänker hänkt
dänk mau wär die wäut wo mir drin läbe länt
dänk mau wär ir wäutgschicht ussert dir no dänkt

dänk mau nache lue di mau um
mach dr mau es biud u frag di mau werum

dänk mau was e schüeler bim lehren aus nid lehrt
dänk mau was e lehrer bim lehren aus vrlehrt
dänk mau was es puurli bim puren aues mues
dänk mau was es huerli bim hueren aues mues

dänk mau nache lue di mau um
mach dr mau es biud u frag di mau werum

dänk mau was en overscht bim befählen aus nid dänkt
dänk mau was dä zoverscht dene zungerscht aus nid schänkt
dänk mau was so schütze üser freiheit nütze
dänk was für ne freiheit di schütze da beschütze

dänk mau nache lue di mau um
mach dr mau es biud u frag di mau werum

dänk mau wi ne frömdarbeiter läbt u win er wohnt
dänk mau was dy blitzableiter aus vom blitz vrschont
dänk mau a dä fixer wo sys letschte gäut vrsprützt het
dänk mau wäm dys bankkonto süsch ussert dir scho gnützt het

dänk mau nache lue di mau um
mach dr mau es biud u frag di mau werum

dänk mau werum du dys dänkmau wettsch u wo
dänk werum du nie kes dänkmau wirsch brcho
dänk mau wär hütt aus es dänkmau hätt vrdient
dänk mau wäm sys dänkmau dr grüenspan hütt begrüent

dänk mau nache lue di mau um
mach dr mau es biud u frag di mau werum

dänk mau was d' so dänksch u dänk wohär das aues chunnt
dänk di mau de queue vo dym dänken uf e grund
dänk wi fescht d' dys dänken ir würklechkeit vrhänksch
dänk emau wi's wär we d' aues seitisch was de dänksch

dänk mau nache lue di mau um
's choschtet ja nid viü u macht eim minger tumm.

(Entstanden 1975, Erstveröffentlichung LP *Improvisatiren*, 1979)